

## BRATA SIWARATRI

Ri kalaning pangelong ping 14 sasih kapitu iraga sareng sami nyanggra rerainan sane mawasta Siwaratri. Siwaratri sane maartos wengin Ida Batara Siwa mateges wengi utama mabakti ring batara Siwa. Kruna Siwa mawit saking kruna basa Sanskerta sane maartos sang mapakayunan becik, seneng ngampurayang, tur ngicenin bagianing urip. Raris batara Siwa wantah pesengan Ida Sang Hyang Widi rikala ida mrelini sahananing mala papa mangda sida dados suci nirmala. Wengi taler mateges peteng. Peteng deriki mateges kapetengan kayun. Dadosne Siwaratri mateges wantah peteng (wengi) galah nglebur utawi mrelini kapetengan kayun nuju margi galang apadang.

Ri kalaning iraga nyanggra rerainan Siwaratri manut sastra agama kapatut pisan iraga nglaksanayang Brata Siwaratri. Brata maartos janji, sumpah, taler kateguhan kayun. Brata Siwaratri maartos janji utawi kateguhan kayun nglaksanayang ajah-ajahan Siwaratri mangda sida molihang waranugrahan Ida Sang Hyang Siwa.

Brata Siwaratri sane patut kamargiang ri kala nyanggra Siwaratri utamannyane *upawasa, monabrata, jagra*. *Upawasa* mateges mapuasa nenten ngajeng ngawit pk. 06.00 (semeng galang tanah) ring panglong ping 14 rauh pk. 18.00 (sandikala) ring tileming sasih kapitu utawi salami 36 jam. Raris *monabrata* artinnyane nenten ngraos utawi mamona suwennyane pateh ring upawasa. Sapunika taler *jagra* sane mateges enten, nenten sirep, utawi matangi ten sirep-sirep saking pk. 06.00 panglong ping 14 rauh pk. 18.00 tilem kapitu. Sapunika patutne iraga nyanggra rerainan Siwaratri manut sastra agama. Yening nenten sida antuk ngamargiang maka tatiga brata Siwaratri punika, sanistane patut ngamargiang brata pajagran (nenten sirep salami 36 jam). Ring iraga para janapada sampun ketah wantah ngamargiang brata pajagran sakadi wengine mangkin.

Kawiaktiane nglaksanayang brata punika wantah matatujon ngicalang papa. Papa mateges, naraka, sangsara, utawi nista. Iraga sareng sami embas ka jagate wantah kari mapawakan bhuta kala. Nika mawinan iraga umat Hindu ngwentenang upacara manusa yadnya ngawit saking gua gharba (magedong-gedongan), macolong, maweton, mapawarangan rauh mawinten gumanti wantah tatujone mresihin tur nyuciang raga sekala niskala.

Idup i manusa wantah kaiket tur kabanda olih bhuta kala. Paiketan i bhuta kala puniki kacihnayang antuk parilaksanane sadina-dina. Yening iraga kari ngulurin indriane tan

sida antuk mitet tur ngeret nika cirine kari kaiket antuk bhuta kala (asuri sampad). Seneng majejuden, ngraos bangras (wak purusya), mamaling, mapunyah-punyah, mamitra (paradara), mamati-mati (himsa karma) muah sane tiosan nika sami ciri kaliput I bhuta kala.

Pangubaktian ring Ida Bhatara Siwa ring Siwaratri puniki wantah matatujon mangdene Ida Bhatara Siwa arsa ledang ngicen waranugraha tur nuntun miwah mrelina sahananing papa tur kapetengan kayun mangda sida *jagra* (sadar) eling ring raga soang-soang. Cirin sang sane sampun *jagra* sampun suci ring pikayunan (suci ring papa), sampun sida mabrata ring ajeng-ajengan (upawasa), mabrata ring laksana (uning nglimbakang tri kaya parisudha) tur uning nibakang babaos sane patut (monabrata).

Yening ambilang mangkin sasuluh ring katatwan Lubdhaka kawiaaktianne iraga puniki sami maparagan juru boros. Kruna Lubdhaka (basa Sanskerta) wantah matesges 'juru boros'. I Lubdhaka maboros ngulati ngrereh *sattwa* (buron). Kruna *sattwa* mawit saking *sat* matesges inti/sari (*hakikat* basa Indonesia) *twa* matesges guna (*sifat*). Iraga ring Bali raris nyutetang kruna *sattwa* punika nados *tatwa* sane matesges ajaran, utawi panuntun kahuripan nuju kasubagan wahyadyatmika. Satuan I Lubdhaka sane geginanipun maboros tur mamati-mati (*puncak kejahatan*) sangkaning ipun *jagra* (sadar) tur polih nyembah Ida Bhatara Siwa, diastun sangkaning nenten matagenan ring telenging alas ri kalaning panglong 14 Tilem kapitu, gumanti ri sampune ipun padem atmanyane sida manggihin swarga ring Siwaloka.

Inggih, kawiaaktiane iraga niki sareng sami juru boros. Wenten sane seneng morosin nomor, wenten sane seneng morosin sasenengan indria, sakadi mamotoh, mamaling, mamitra, mamunyah, mamati-mati miwah sane tios-tiosan. Yaning dados antuk ngiring ngawit iraga nyanggra rerahinan Siwaratri mangkin seka kedik *jagra* (sadar) ring kawentenan tatujon idup iraga umat Hindu. *Jagra* ring kawentenan kasenangan sane ngawinang kaon seka akedik icalang, papa sangsara hidupe mangkin, kelesang saking paiketan i bhuta kala.

Cutetne ri kalaning ngamargiang brata Siwaratri (*jagra*) matesges sapunapi ja iwang pamargi ring hidup puniki (*papa*) yening iraga sampun *jagra* (sadar) janten Ida Bhatara Siwa pacang mapaica waranugraha nglebur (mrelina) sahananing papa sangsara punika. Ngiring seka kedik maboros satwa utawi *tatwa* anggen sasuluh ring hidupe puniki. Dumogi sidaning don. Astu!